

# ЎЗБЕКИСТОНДА ЕР РЕСУРСЛАРИДАН САМАРАЛИ ФОЙДАЛАНИШДА ХОРИЖ ТАЖРИБАСИНИНГ ЎРНИ ВА АҲАМИЯТИ

Навотова Д.И.-Шахрисабз давлат педагогика институти

г.ф.ф.д. (PhD), доценти. Ўзбекистон

**Аннотация.** Ушбу мақолада Ўзбекистон қишлоқ хўжалиги ихтисослашуви ва мулкчилик шаклларида асосий ўринни эгаллаган фермер хўжаликлари ривожланиши, ер ресурсларидан фойдаланишда хориж тажрибаларидан фойдаланиши таҳлил қилинган. Шунингдек, ер ресурсларининг фермер хўжаликлари ўртасида тақсимланишига таъсир кўрсатувчи табиий, демографик, иқтисодий омиллар ҳам тадқиқ этилган.

**Калит сўзлар:** Қишлоқ хўжалиги, фермер хўжалиги, ер ресурси, ер ислоҳоти, ихтисослашув.

## ОСОБЕННОСТИ ИСПОЛЬЗОВАНИЯ ЗАРУБЕЖНОГО ОПЫТА ИСПОЛЬЗОВАНИЯ ЗЕМЕЛЬНЫХ РЕСУРСОВ В УЗБЕКИСТАНЕ

Навотова Д.И. - Доцент Шахрисабзского государственного педагогического

института. Узбекистан

**Аннотация.** В статье анализируется развитие фермерских хозяйств, занимающих ведущее место в специализации и формах собственности сельского хозяйства Узбекистана, использование зарубежного опыта использования земельных ресурсов, изучаются природные, демографические и экономические факторы, влияющие на распределение земельных ресурсов между фермерскими хозяйствами.

**Ключевые слова:** Сельское хозяйство, фермерство, земельные ресурсы, земельная реформа, специализация.

## FEATURES OF USING FOREIGN EXPERIENCE IN LAND RESOURCES USE IN UZBEKISTAN

Navotova D.I. - Associate Professor, Shakhrisabz State Pedagogical Institute. Uzbekistan

**Abstract.** The article analyzes the development of farms occupying a leading place in the specialization and forms of ownership of agriculture in Uzbekistan, the use of foreign experience in the use of land resources, and studies natural, demographic and economic factors influencing the distribution of land resources between farms.

**Key words:** Agriculture, farming, land resources, land reform, specialization.

*Ер ресурси* бу – ер фондининг таркибий қисми бўлиб, у ўзига хос тупрок сифати, иқлим, рельеф, гидрогеологик хусусиятлари билан тавсифланади, жамиятнинг муайян ривожланиш босқичида ундан асосан зарур маҳсулотлар етиштиришда ва бошқа мақсадларда фойдаланилади. Бу таърифдан келиб чиқиб таъкидлаш лозимки, ер кўп функцияли ҳисобланиб, бир вақтнинг ўзида қишлоқ хўжалиги ишлаб чиқаришида асосий меҳнат воситаси ва предмети бўлиши билан бир қаторда аҳоли, саноат, уй-жой фонди, рекреация зоналари ва бошқаларни ҳудудий ташкил этишда етакчи саналади [9].

Ўзбекистонда фермер хўжаликларини ташкил этиш ва уни ривожлантириш борасида ислохотлар дастлаб Ўзбекистон Республикаси Президентининг 1991 йил 29 декабрдаги “Деҳқон (фермер) хўжаликларини янада мустаҳкамлаш ва республикада ишбилармонлик фаолиятини давлат йўли билан қўллаб-қувватлаш тўғрисида”ги Фармони ва Ўзбекистон Республикаси Вазирлар Маҳкамасининг 1991 йил 30 декабрдаги 315-сонли “Республикада деҳқон (фермер) хўжаликларини янада ривожлантириш ва мустаҳкамлаш чоралари ҳақида”ги қарори ишлаб чиқилиши билан бошланди. Ўтган давр мобайнида фермер хўжаликлари тўлиқ шаклланди ва ривожланиб бормоқда. Мамлакатимизда бу борада муайян даражада тажриба орттирилди. Бироқ, таъкидлаш жоизки, аксарият хорижий давлатларда фермер хўжаликлари ташкил этилганига бир асрдан ортиқ вақт бўлган ва уларда бу соҳада бой тажриба тўпланган. Мазкур давлатлар тажрибаларидан республикамиз фермерлик ҳаракатини янада ривожлантиришда қўллаш, уларни хўжалик юритиш фаолиятларига тадбиқ этиш муҳим илмий-амалий аҳамият касб этади. Жумладан, Америка Қўшма Штатларида фермер хўжалиги ривожлаганлигининг асосий хусусияти юқори даражада ихтисослашганлиги ва механизациялашганлиги ҳисобланади. Шу боис, бундай хўжаликларда, одатда, фермер ва унинг оиласи, баъзан бир-иккита қўшимча ёлланма ишчи меҳнат

қилади. Табиий шароитига боғлиқ ҳолда фермер хўжаликлари сони штатлар даражасида турлича тақсимланган. Хусусан, энг кўп фермерлар Техас, Миссури, Айова штатларида фаолият олиб борса, айна вақтда, шимоли-шарқда жойлашган Коннектикут ва Делаверда уларнинг сони нисбатан кам.

АҚШ статистикасида маҳсулотини бир йилда 1000 доллардан ортиққа сотган фермер хўжаликлари ҳисобга олинади, 250 минг доллардан кўп маҳсулот реализация қилганлари йирик, ундан кам бўлса кичик хўжалик сифатида қайд этилади. Жами фермер хўжаликлари маҳсулотларини 80,0 фоизи йирик хўжаликларда ишлаб чиқарилади [2]. Хўжаликлар катта бўлса ҳам, кичик бўлса ҳам асосан битта оила фаолият олиб боради. 1950 йилга қараганда АҚШ фермер хўжаликларининг ўртача ҳажми 2,1 мартага ошган, яъни 87,0 гектардан 187,0 гектарга етган ва бу жараён кейинги йилларда ҳам давом этмоқда. Хўжаликларнинг асосий қисми 20 гектаргача (30 %) ва 70-200 гектар оралиғида (25 %) шаклланган. Демак бу мамлакатда йирик хўжаликлар билан биргаликда кичик хўжаликлар ҳам самарали фаолият олиб боришмоқда.

АҚШда сўнгги йилларда ерларни ижарага олиш кенг тарқалмоқда. Ижарачи сифатида асосан фермерлар хизмат қилади. Аммо, баъзи штатларда ижарачи шаҳарда яшовчи, қишлоқ хўжалиги соҳасидан мутлақо хабари йўқ кишилар ҳам бўлиши мумкин. Ижарага 15 гектардан 35 гектаргача ер берилади. Бир гектар лалми ерлар нархи 180, суғориладиган ерлар 350, яйловлар эса 23 доллар атрофида. Айтиб ўтиш жоизки, мамлакатда жами меҳнатга яроқли аҳолининг 2,5 фоизи қишлоқ хўжалиги ишлаб чиқаришида банд [1].

Японияда Иккинчи жаҳон уришидан сўнг ер ислохотлари қайта кўриб чиқилди. Йирик монопол бирлашмалар тарқатилиб, уларнинг ерлари кичик мулкдорлар – фермерларга бўлиб берилди. Бундай ерлар 1946 йилда қабул қилинган “Ер ислохотлари тўғрисида” ги қонунига мувофиқ, монопол бирлашмаларнинг қайта пайдо бўлмаслиги мақсадида чекланган. Бинобарин, бугунги кунда Японияда мавжуд фермер хўжаликларининг 2/3 қисмидан

ортиги бир гектаргача бўлган ерларда фаолият олиб боради. Фақатгина 1,7 фоиз фермерлар ихтиёрида 5,0 га ва ундан ортиқ ер (Хокайдо оролида) мавжуд. Ҳозирги вақтда Японияда жами 4,3 млн. дан ортиқ фермер хўжаликларининг тахминан 15 фоизи ушбу тармоқдан оладиган даромад ҳисобига ҳаёт кечиради [7].

Чунки, ер майдонларининг бундай кичик эканлиги фермерларни қишлоқ хўжалиги маҳсулотларини етиштириш билан бирга бошқа соҳаларда ҳам банд бўлишига олиб келган. Японияда чорвачиликка ихтисослашган бир фермер хўжалигига ўртача 32 бош чорва ҳайвони тўғри келади ва улар асосан молхоналарда парвариш қилинади. Бу мамлакат фермерлари ер майдонлари кичик бўлганлиги боис ёлланма ишчилар меҳнатидан фойдаланишмайди. Таъкидлаш лозимки, Японияда 200 йиллик тажрибага эга бўлган беданачилик фермер хўжаликлари ҳам мавжуд [5].

Австралия иқтисодиётида ҳам қишлоқ хўжалиги катта аҳамиятга эга. 2012 йил 1 январь ҳолатига ушбу мамлакатда 136 минг фермер рўйхатга олинган. Улар мамлакат ер майдонини 60 фоизини эгаллайди. Бу ерда ҳам фермер хўжаликларининг сони қисқариб, ўртача ер майдони ортиб бормоқда. Чорвачиликда асосан қўй ва йирик шохли қорамоллар боқилса, деҳқончиликда ғалла ва мева асосий экин тури ҳисобланади. Бир фермер хўжалигига ўртача 17 бош йирик шохли қорамол парвариш қилиниб, шундан 7 таси соғин сигирлардир. Мамлакатда фермерлари кўпроқ гўштга ихтисослашганлиги билан ажралиб туради [3].

Европа мамлакатларида фермер хўжаликларининг майдони 10 гектардан 60 гектаргача, бир хўжаликда боқиладиган йирик шохли қорамоллар 30-300 бош, чўчқалар 50 бошдан 100 бошгача фарқланади. Бундай ҳудудий тафовутларнинг юзага келишига жойларнинг ем-хашак базаси таъсир этган. Уларда фермер хўжаликларининг ўртача ермайдони 13,9 гектар бўлиб, айтилган вақтда, мамлакатлар бўйича бу кўрсаткич бир-биридан фарқ қилади. Масалан,

Британия фермер хўжалигининг ўртача ер ҳажми 80,4 гектарни, Данияда 30,7, Францияда 29,0, Ирландияда 22,7, Германияда 18,0, Голландияда 14,9, Белгияда 14,1, Италияда 10,8, Грецияда 4,3 гектарга тенг. Кейинги ўринларда Скандинавия давлатлари туради, уларнинг фермерлари нисбатан кичик-кичик ерлардан фойдаланади [4].

Бугунги кунда мамлакатимизда фермер хўжаликлари ер майдонларини белгилашда (оптималлаштиришда) қатор мунозарали ҳолатлар юзага келмоқда. Бу соҳада ҳам хорижий, шу жумладан, МДХ давлатлари тажрибасини ўрганиш муҳим аҳамият касб этади. Ушбу мамлакатларда фермер хўжаликларининг ер майдонлари 1 гектардан (Арманистон) 50 гектаргача (Украина, Белоруссия, Россия) ўзгаради. Бинобарин, Россия “Дехқон (фермер) хўжаликлари тўғрисида”ги Федерал қонунига мувофиқ, бундай хўжаликлар алоҳида оила, бир неча оилалар гуруҳи ва оиладан ташқаридагилар билан биргаликда ҳам ташкил этилади ва давлат томонидан қўллаб-қувватланади. Ушбу давлат аграр иқтисодиётида бугунги кунда мазкур мулкчилик шаклининг аҳамияти ортиб бормоқда. Хусусан, сўнгги 15 йил ичида уларнинг сони 5 мартага кўпайган. Айниқса, бу кўрсаткич чорвачиликда жуда тез ўсиб борган [6].

Ўрганишлар шуни кўрсатадики, АҚШ, Канада, Швеция, Дания, Япония каби мамлакатларнинг қишлоқ хўжалиги маҳсулотларини асосан оилавий фермер хўжаликлари яратади. Дунё бўйича фермер хўжаликлари ер майдонларини мақбуллаштириш, энг самарали ҳажмини белгилаш бўйича кўплаб олимлар томонидан тадқиқот олиб борилган бўлса-да, бироқ, бу борада бир фикрга келинмаган [8]. Бу хўжаликларнинг катта-кичиклиги жойларнинг табиий шароити, демографик ҳолати ва иқтисодий вазияти билан изоҳланади. Тадқиқотлар кўрсатишича, аксарият хорижий мамлакатларда фермер хўжаликлари тараққиёти асосан қуйидаги омилларга боғлиқ:

- фермер хўжаликларининг давлат томонидан қўллаб-қувватлаш механизмини самарали ташкил этиш;

- фермер хўжаликлари билан боғлиқ ҳуқуқий-меъёрий асосларни такомиллаштириш;
- фермерларни қишлоқ хўжалиги техникалари билан таъминлаш ва эскирганларини янгилаб бориш;
- фермерларга ажратилаётган кредит ставкаларини пасайтириш ва имтиёзли солиқ тизимини жорий этиш;
- ахборот, хизмат кўрсатиш ва қайта ишлаш соҳаларини янада ривожлантириш.

Таҳлиллардан кўриниб турибдики, кооперативлар фермер хўжаликлари фаолиятини ривожлантириш, уни самарадорлигини ошириш, натижада, қишлоқ хўжалиги маҳсулотлари ишлаб чиқариш ҳажмини кўпайтиришда муҳим аҳамият касб этади. Шундай экан, мамлакатимизда ҳам бундай бирлашмаларни йўлга қўйиш, фермерларга кооперациянинг афзаллигини тушунтириш, уларни ихтиёрий бирлашишини таъминлаш мақсадга мувофиқ. Умуман олганда, фермер хўжаликларини ташкил этиш, ихтисослаштириш, ривожлантириш ва бошқариш борасида бозор иқтисодиётига асосланган ривожланган давлатларда шаклланган бой тажрибаларни комплекс таҳлил қилиш, ўрганиш ва умумлаштирган ҳолда республикамиз фермер хўжаликларини тараққий этиши учун илмий таклиф ва тавсиялар ишлаб чиқиш ҳамда уларни амалиётга тадбиқ этиш ушбу соҳани самарадорлигини янада оширади.

#### **Фойдаланилган адабиётлар:**

1. Болотова Ю. Поддержка сельскохозяйственных товаропроизводителей в США // ФПК: экономика, управление. – 2004. - № 1.-С.37.
2. Быстров С. Моделирование крестьянских хозяйств //АПК: экономика, управление. – 1992.- №4. – с.10-14.
3. Матаев А.А., Супьянов Р.М.-З. Модернизация фермерского хозяйства: иллюзии и реальность: дайджест мирового опыта.- Нальчик Грозный: Тетраграф, 2012. – 549 с.
4. Матусевич, В.А. Фермерство и сельскохозяйственная кооперация в США.- М.: Знание, - 1991.- 189 с.

5. Никонов А.А. Аграрная реформа и сельскохозяйственная кооперация // Аграрная наука.- 1995.- №6.- с. 4-5.
6. Сидоренко В. Развитие фермерства в России // Международный сельскохозяйственный журнал. – 2009. № 3. – С.6-8.
7. Қурбонов И.Т. Фермер хўжаликларини барқарор ривожлантириш ва уларнинг самарадорлигини ошириш имкониятлари (Сурхондарё вилояти маълумотлари асосида). Иқтис. фан. ном. илм. дараж. ол. учун ёз. дисс. – Самарқанд, 2006. – 135 б.
8. Ражабов Ф.Т. Фермер хўжаликларининг ихтисослашуви ва ҳудудий таркибини такомиллаштириш (Қашқадарё вилояти мисолида). Геог. фан. фалс. докт. илм. дараж. ол. учун ёз. дисс. – Тошкент, 2018. – 157 б.
9. Файзуллаев М.А. Жанубий Ўзбекистон қишлоқ хўжалиги географияси (Монография). Қарши, “Университет”, 2019. – 245 б.
10. Navotova D.I. Theoretical and methodological aspects of resources of land resources in agriculture//Academicia: An International Multidisciplinary Research Journal. November, 2022. – P. 40-44
11. Навотова Д.И. Қашқадарё вилояти қишлоқ хўжалиги географияси ва уни карталаштиришнинг баъзи масалалари// Электронное научно-практическое периодическое издание. Экономика и социум. №3 (94), 2022. –721-725 с.
12. Навотова Д.И. Географические особенности использования зарубежного опыта использования земельных ресурсов в хозяйственных хозяйствах// Электронное научно-практическое периодическое издание. Экономика и социум. №4 (95), 2022. –198-202 с.
13. Navotova D.I. Internal Differences In The Use Of Land Resources In The Agriculture Of Kashkadarya Region// Eurasian Journal of History, Geography and Economics. Volume 16. Belgiya. 2023. P.100-104